

Վ. Ս. Բալբուրգյան

ՆՈՐ ԶՈՒՂԱՅԻ ՀԱՅԿԱԿԱՆ ԳԱՂՈՒԹԸ ԵՎ ԿԱԹՈՒԿ ՄԻՍԻՈՆԵՐՆԵՐԻ ԿԱԶՄԱԿԵՐՊՈՒԹՅՈՒՆՆԵՐԸ

1.

17-րդ դարում Արևելքի՝ երկրներում պայքարը եվրոպական գաղութա-
րարների միջև սկսում է կրել առավել սուր բնույթ: Այդ պայքարի ասպարեզ-
ներից մեկն է դառնում նաև Իրանը, որը եվրոպական պետությունների կող-
մից դիտվում էր որպես ոչ միայն լուրջ ռազմական և քաղաքական գործոն,
եվրոպային սպառնացող թուրքական վտանգը դիմագրավելու համար, այլև
որպես Հնդկաստան տանող առևտրական ճանապարհների վրա ընկած և եվրո-
պական մանուֆակտուրաների համար առատ հումք մատակարարող երկիր:
Կանխելով միմյանց, եվրոպական պետությունները եռանդուն ջանքեր էին
գործադրում կապիտուլյացիոն պայմանագրերի և սեֆևյան շահերից ստացած
զանազան արտոնագրերի միջոցով թափանցել Իրան և այն ամբողջապես են-
թարկել իրենց քաղաքական և տնտեսական ազդեցությանը: Այդ գործում
հատկապես մեծ դեր էին խաղում եվրոպական կաթոլիկական միսիոներները,
որոնք կրոնի բարոզության անվան տակ թափանցելով Իրան, իրականում հե-
տապնդում էին քաղաքական նպատակներ: Նրանք հող էին նախապատրաս-
տում եվրոպական առևտրական կապիտալի տիրապետության համար Իրա-
նում և աշխատում էին պայմաններ ստեղծել իրենց պետությունների գաղու-
թային քաղաքականության իրականացման համար: Հաստատվելով Իրանում
և սեֆևյան շահերից ստանալով մի շարք արտոնություններ, կաթոլիկ եկե-
ղեցին բացառիկ մեծ դեր խաղաց Իրանում արևմտաեվրոպական գաղութա-
րարների օգտին կապիտուլյացիոն ռեժիմ սահմանելու գործում¹:

Իրան ժամանող միսիոներները պատկանում էին տարբեր կրոնական միա-
բանությունների և արտահայտում էին տարբեր եվրոպական պետությունների
շահերը: Եվրոպական միապետներից և Հռոմի պապից բերած նրանց նամակ-
ներում հիմնականում արժարժվում էին հակաթուրքական դաշինք կնքելու,
Թուրքիայի դեմ պատերազմ սկսելու, եվրոպական երկրներին առևտրի բնա-
գավառում արտոնություններ տրամադրելու և Սեֆևյան պետության քրիս-
տոնյա բնակչությանը «հովանավորելու» հարցերը²:

Հռոմի հատուկ ուշադրությանն են արժանանում հայերը, որոնք կազմում

¹ کاظم صدر، تاریخ سیاست خارجی ایران. طهران. 1943، ص 60.
بناهبان محمود فرزند غلامحسین. درباره رژیم کابینتولاسیون در ایران.
(مسکو، 1962، ص 142. (Գիտություն.)

² Berthold (Ignace de Ste-Anne), Histoire de l'établissement de la mission de
Perse par les peres Carmes dechausses, Bruxelles, 1885, p. p. 246—247.

էին Սեֆեյան պետության քրիստոնյա բնակչության մեծամասնությունը⁴։ Միսիոներներն իրենց ուշադրությունը հատկապես կենտրոնացնում էին Նոր Զուղայի հայության վրա⁵։ Այդ պատահական չէր. Նոր Զուղայի հայ առևտրական կապիտալը սկսում էր աչքի ընկնող դեր խաղալ Իրանի տնտեսական կյանքում՝ իր ձեռքում կենտրոնացնելով Իրանի արտաքին առևտրի նշանակալից մասը և միաժամանակ հանդես դալով իրանա-եվրոպական առևտրի միջնորդի դերում։ Նոր Զուղան հանդիսանում էր նաև լուսավորչական եկեղեցու թեմական կենտրոնը իրանահայ գաղութում և որպես այդպիսին նշանակալից դեր էր խաղում իրանահայերի հասարակական-կրոնական կյանքում։ Միսիոներները հասկանում էին, որ իրանահայերին կաթոլիկ եկեղեցու կողմը գրավելու համար առաջին հերթին հարկավոր է հարված հասցնել լուսավորչական եկեղեցու այդ հենարանին։ Այդ իսկ պատճառով կաթոլիկ միսիոներությունը այստեղ հանդես էր գալիս ավելի մեծ ակտիվությամբ։

Հռոմի հանձնարարությամբ միսիոներները մեծ եռանդով ձեռնամուխ ևն լինում Նոր Զուղայի հայերի վիճակի ուսումնասիրմանը և իրենց դիտումների մանրամասն հաշվետվությունները պարբերաբար հաղորդում են Հռոմ⁶։ Դա անհրաժեշտ էր վերջինիս՝ մշակելու համար միսիոներների գործունեության մանրամասն պլան ջուղայահայ բնակչության մեջ։

Հայ բնակչության ամենատարբեր խավերի հետ լայն շփում ունենալու և նրանց համակրանքը շահելու համար, որպես կանոն, միսիոներներն ունենում էին այս կամ այն օգտակար մասնագիտությունը⁷։ Կաթոլիկ-քարոզիչները դիմում էին նաև մի այլ փորձված միջոցի։ Նրանք աշխատում էին օգտագործել սոցիալական ներհակությունները ժողովրդի տարբեր խավերի մեջ և ճիգ էին անում դժգոհ տարրերին գրավել իրենց կողմը⁸։

Միսիոներներն առանձնակի եռանդ էին ցուցաբերում Նոր Զուղայի առևտրական կապիտալի ներկայացուցիչներին դավանափոխ անելու և կամ գոնե նրանց լոյալ վերաբերմունքը ձեռք բերելու գործում։ Սերտ առևտրական կապեր ունենալով Եվրոպայի հետ, Զուղայի առևտրական դասը ստիպված էր բացահայտ թշնամական դիրք չբռնել կաթոլիկ միսիոներների հանդեպ, որովհետև դա սպառնալիք կարող էր ստեղծել իրենց առևտրական գործերին Եվրոպայում։ Մյուս կողմից, Զուղայի խոջայությունը միսիոներների նկատմամբ իր վերաբերմունքը ստիպված էր համակերպել պարսկական կառավարության եվրոպական պետությունների նկատմամբ բռնած դիրքի համեմատ։ Շարդենը այդ առթիվ նշում է, որ «Հայերը կաթոլիկներին հարգում էին այնքան ժամանակ, որքան պարսկական կառավարությունը հարգում էր եվրոպացիներին»⁹։

Կաթոլիկ միսիոներների նամակագրությունից, Հռոմի պապի և իրենց ղեկավարների հետ, ակնառու կերպով երևում է, որ ջուղայեցի հայ խոջաները սկզբունքորեն դեմ լինելով կաթոլիկներին, առերես բարեկամական վերաբերմունք էին ցույց տալիս նրանց, ելնելով իրենց նեղ առևտրական շահերից։

⁴ A Chronicle of the Carmelites in Persia and the Papal Mission of the XVII and XVIII centuries, London, 1939, vol. I, p. 158.

⁵ Ibid., II, p. 1072.

⁶ Ibid., I, p. 157.

⁷ Հայկ Աճեմյան, Նոր Զուղայի հայոց գերեզմանատան լատիներեն հին տապանադիրները (սթագմավեպ), 1944, № 1—6, էջ 42—43.

⁸ Արտ. Կարինյան, Ակնարկներ հայ պարբերական մամուլի պատմության, հ. 1, Երևան, 1956, էջ 114.

⁹ Chardin, Jean de, Voyage en Perse, ed. Langles, Paris, 1811, t. VIII, p. 110.

Բնական է, որ եվրոպական պետությունների ներկայացուցիչների՝ միսիոներների նկատմամբ Զուգայի վաճառականության բացահայտ թշնամական դիրք գրավելու դեպքում, եվրոպայում նրանց առևտուրը կարող էր կրել մեծամեծ վնասներ: Իսկ դա, իր հերթին, շոշափելի հարված կհասցներ Իրանի արտաքին առևտրին, որի մեծ մասը գտնվում էր ջուղայահայ վաճառականների ձեռքին, մի բան, որը տեղիք կտար պարսկական կառավարության դրժդոհությանը: Այս նկատառումներից ելնելով Զուգայի վաճառականությունը իր համոզմունքներին հակառակ, ոչ միայն համակրական վերաբերմունք էր ցույց տալիս կաթոլիկ քարոզիչների հանդեպ, այլև գործնականապես օգնում էր նրանց Զուգայում և Սպահանում հաստատվելու և եկեղեցիներ ու դպրոցներ բաց անելու գործում: Միսիոներների Հռոմ գրած նամակներում մենք հանդիպում ենք բազմաթիվ դրվատական խոսքերի Զուգայի առևտրական կապիտալի ներկայացուցիչների հասցեին: Այսպես՝ 1629 թ. օգոստոսին Հռոմի Ս. Ժողովը Ֆրանսիայի նվիրակի միջոցով հոջա Նազարին է հղում մի շնորհակալագիր, այն աջակցության համար, որ նա ցույց է տալիս կապուչինյան միաբանության անդամներին: Միաժամանակ առաջարկում է նրան, որ եթե առաջիկայում պատահեն առիթներ, նա չզլանա օգնել նրանց, հավատացած լինելով, որ որպես փոխադարձ վարձատրություն կարժանանա առաքելական Ս. Թոմի հիշատակարանի մեջ անմոռաց դառնալու պատվին¹⁰: Մի այլ նամակով, դրված 1633 թ. հունվարի 5-ին, Հռոմը այս անգամ քարմեղիքների անունից իր երախտագիտության խոսքն էր ասում հոջա Նազարին, հիշյալ միաբանության միսիոներների նկատմամբ նրա արած շնորհների և օգնության համար¹¹:

Ավելի ուշ նման քաղաքականություն կաթոլիկ քարոզիչների նկատմամբ վարում է նաև Նոր Զուգայի ազդեցիկ խոջաներից մեկ ուրիշը՝ հոջա Սարֆրազը: Այդ երևում է Քարմելիթ Բալթազարի 1653 թ. Սպահանից Հռոմին հասցեագրված նամակից. «Այստեղ մենք շատ լավ հարաբերությունների մեջ ենք Սարֆրազ անունով Զուգայի քալանթարի հետ: Նա մեծ բարիքներ է անում պապին և քարմեղիքյան հայերին»¹²:

Հայ երեխաներին կաթոլիկական ոգով դաստիարակելու համար միսիոներներն աշխատում էին Նոր Զուգայում բաց անել դպրոցներ: Խոսելով այդպիսի դպրոցների նույնատակի և նրանց կարևոր դերի մասին, Զոն Քազդեուսը Հռոմ դրած նամակներից մեկում գրում է. «Մենք կարծում ենք, որ այս երկրում ձեռք կրերենք ավելի մեծ արդյունքներ, եթե լինեին մի դպրոց հայ երեխաների համար: Դա անհրաժեշտ է, որովհետև նրանց կարող ենք մեզ մոտ սովորեցնել մեր կանոնները, որից հետո կարելի կլինի նրանց ուղարկել Հռոմ, որտեղ ավելի բարձր կրթություն ստանալով կվերադառնան հայրենիք՝ ծառայելու ի փառս աստծո»¹³:

Քարմեղիքներին հաջողվում է Շիրակում և Սպահանում բաց անել դպրոցներ: Նույնանման մի դպրոց նրանք բաց են անում նաև Նոր Զուգայում, բացառապես հայ երեխաների համար¹⁴:

¹⁰ «Հանդէս ամսօրեայ», 1933, № 7—8, էջ 384—386:

¹¹ Նույն տեղում:

¹² A Chronicle..., I, p. 378.

¹³ A Chronicle..., I, p. 192.

¹⁴ Նույնը, I, էջ 319, 445, 454 և նույնը, 2, էջ 1080, 1082:

հոջա Նազարը լինում է առաջիններից մեկը, որն իր որդուն հանձնում է քարմելիթներին՝ նրանց մոտ կրթություն ստանալու և եվրոպական լեզուներ սովորելու համար¹⁵։ Բնական է, որ նրա այդօրինակ վարմունքը վարակի օրինակ էր հանդիսանալու նաև ուրիշների համար։

Հռոմին գոհացնելու համար հայ խոջաները կաթոլիկություն ընդունած խոջաների հետ համատեղ համաձայնություն էին տվել ֆինանսավորել հայ երեխաների համար Հռոմում բացվելիք դպրոցը։ Դա լինելու էր տեղական բնակիչներից կաթոլիկ քարոզիչների պատրաստման մի դարբնոց, որի շրջանավարտները վերադառնալու էին հայրենիք՝ իրենց հայրենակիցների մեջ կաթոլիկություն քարոզելու համար։ Սակայն միսիոներներին մատուցած իրենց ծառայությունների փոխարեն խոջաներն աշխատում էին ստանալ փոխհատուցում։

Խոջա Նազարը քարմելիթյան կրոնավոր Թադդեուսի միջոցով, որ 1629 թ. պատրաստվում էր Հռոմ մեկնել, հայ վաճառականների անունից խնդրում է, որ Հռոմի պապը աջակցի, որպեսզի հայ վաճառականներին շնորհվեն քահանայապետական պետության և ուրիշ քրիստոնյա երկրների մեջ կայաններ, ուր նրանք կարողանային արտահանել իրենց ապրանքները առանց մաքսավճարումների¹⁶։

Հռոմը, իհարկե, հեշտությամբ չէր բավարարելու հայ խոջաների խնդիրը։ Ի պատասխան Խոջա Նազարի խնդրի, «Պրոպագանդայի ժողովը» պատասխանում է, որ այդպիսի թույլտվություն նա կարող է տալ միայն Նոր Զուղայի այն առևտրականներին, որոնք հարում են կաթոլիկ եկեղեցուն։ Պատասխանը միանգամայն համապատասխանում էր Հռոմի վարած քաղաքականության ոգուն, այն է՝ արևմուտքից որևէ պաշտպանություն և օժանդակություն ստանալու անհրաժեշտ պայմանը՝ պապության հպատակությունն է¹⁷։ Սակայն կաթոլիկ եկեղեցու հիշյալ սկզբունքը չէր ենթադրում, որ պետք է բոլոր հարցերում անհաշտ դիրք բռնել ոչ կաթոլիկ կամ կաթոլիկություն ընդունել չցանկացող հայ խոջաների նկատմամբ։ Քաջ ծանոթ լինելով հայ խոջայության ունեցած դիրքի և ազդեցության հետ Իրանի գաղութում և հայ հոգևորականության վրա, նրանք պարզապես չէին կարող հաշվի չնստել նրա շահերի հետ, որովհետև հակառակ դեպքում իրենց քարոզչական գործը վտանգի տակ կդնեին ոչ միայն Նոր Զուղայում, այլև Իրանի այլ հայաշատ կենտրոններում։ Այդ պատճառով հարուստ և ազդեցիկ խոջաների համակրանքը շահելու և նրանց դիրքն ու ազդեցությունը իրենց գործի հաջողությանը ծառայեցնելու համար միսիոներներն իրենց հերթին նրանց մեծ ու փոքր ծառայություններ էին մատուցում։ Այսպես, եվրոպական երկրների հետ իրենց ունեցած սերտ կապի շնորհիվ, նրանք այս կամ այն երկրում խոջաների ապրանքի վաճառքից ստացված գումարը բերում հասցնում էին նրանց։ Եվ դա նրանք անում էին այնպիսի ճշտապահությամբ և ազնվությամբ, որ առաջ էին բերում խոջաների գոհունակությունը։ Բացի այդ, նրանք թարգմանում էին խոջաների առևտրական կամ պայմանագրային փաստաթղթերը, եվրոպական երկրներ-

¹⁵ Նույնը, 1, էջ 318—319։

¹⁶ Շահնդես ամսօրեայ, 1934, էջ 514 և հտ.։

¹⁷ Մ ա դ ա ք ի ա ա ր ք ե ա յ. Օրմանեան, Հայոց եկեղեցին և իր պատմությունը, վարդապետությունը, վարչությունը, բարեկարգությունը, արարողությունը, դրականությունը ու ներկայ կացությունը, Կոստանդնուպոլիս, 1911, էջ 106։

րից ստացված կամ ուղարկվելիք նամակները, Եվրոպայում նրանց համար որոնում էին նորանոր կոնտրագենտներ, որով է՛լ ավելի էին բնդլայնում նրանց առևտրական կապերը Եվրոպական երկրների հետ¹⁸։

Երբեմն Եվրոպայում Զուղայեցի վաճառականներին, որպես լուսավորչական եկեղեցու հետևորդների, վերաբերվում էին որոշ կասկածանքով, ինչպես սովորաբար բնդունված էր վերաբերվել «հերետիկոսների» և «անհավատների» նկատմամբ։ Այդ անցանկալի վերաբերմունքից խուսափելու համար խոջաները ստիպված էին հանձնարարական նամակներ վերցնել Նոր Զուղայում և Սպահանում ղործող միսիոներներից, դա նրանց մեծապես օգնում էր Եվրոպայում հաջող առևտրական գործարքներ կատարելու¹⁹։ Խոջաները օգտվում էին նաև միսիոներների միջնորդությունից՝ Եվրոպայում այս կամ այն հանցանքի կամ օրինազանցության պատճառով դատապարտված իրենց ընկերներին ազատելու համար²⁰։

Լավ գիտակցելով, որ իրենց գործի հաջողությունը միայն հայ խոջաների վերաբերմունքից չի կախված, այլ նաև պարսկական կառավարության բռնած դիրքից՝ դեպի կաթոլիկ սլոպագանդը, միսիոներները ջանում էին որոշ ծառայություններ մատուցել նաև պարսկական կառավարությանը։ Այսպես, օրինակ, հայ խոջաների անունից միսիոներները խնդրում են պապին ճշնշում գործ դնել Իսպանիայի Թագավորի վրա, վերջ տալու համար փորթուգալացիների անկարգություններին Հորմուզում²¹։ Այս դիպուկ քայլով նրանք ոչ միայն խոջաներին, այլև պարսկական կառավարությանը գոհունակություն էին պատճառում։

Սակայն, նման օգտակար ծառայությունների միջոցով հայ առևտրական դասի համակրանքը շահելու քաղաքականությունը ոչ միշտ էր, որ տալիս էր ցանկալի արդյունք։ Այդպիսի դեպքերում միսիոներները դիմում էին ավելի կտրուկ միջոցների։ Նրանք իրենց նկատմամբ թշնամական ու անհաշտ դիրք բռնած վաճառականների գիմադրությունը աշխատում էին կոտրել դիպչելով նրանց ամենախոցելի տեղին՝ առևտրական շահերին։ Անհրաժեշտ դեպքում հաճախ դիմում էին Եվրոպական կաթոլիկական երկրների կառավարություններին, որպեսզի վերջիններս ճնշում գործադրեն իրենց երկրներում առևտուր անող ջուղայեցի վաճառականների վրա։ Նրանց այդ պահանջը սիրով կատարվում էր։ Առանց որևէ լուրջ պատճառի, հաճախ, Եվրոպայում, տուգանքի էին ենթարկում հայ խոջաներին, անօրինական ճանապարհով նրանցից վերցնում էին լրացուցիչ մաքս, արգելակում էին կամ արհեստականորեն ձգձգում ապրանքների վաճառքը և այլն²²։ Երբեմն նույնիսկ հայ խոջաներին արգելում էին մուտք գործել Եվրոպական կաթոլիկական երկրները, լավագույն դեպքում բռնագրավում էին նրանց ապրանքները, կախնք էին դնում դրանք տեղափոխող նավերի վրա²³ և այլն։

Զուղայում մեծ խռովություններ ծագելու և կաթոլիկների նկատմամբ հալածանքներ սկսվելու դեպքում անմիջապես Հոմ և Եվրոպական կաթո-

¹⁸ A Chronicle..., I, p. p. 295, 375, 378, 505; II, p. 1073.

¹⁹ Ibid, I, p. 318.

²⁰ A Chronicle..., II, p. 1074.

²¹ Ibid, I, p. 141.

²² A Chronicle..., I, p. p. 439, 461, 469, 475, 493, 632; II, p. 1074.

²³ Ibid, I, p. p. 506, 510.

լիակական երկրներ էին թուլում միսիոներների տաղանապալից նամակները՝ օգնության աղերսով: Դրանցում առաջարկվում էր պատասխան միջոցներ ձեռնարկել Եվրոպայի հայկական զաղութներում բնակվող հայության և հատկապես Զուղայի առևտրական ներկայացուցիչների նկատմամբ:

Այսպես՝ Ավգուստինյան միաբանության անդամ Զոդեֆ դե Ռոզարիոն Սպահանից «Հավատի պրոպագանդային» 1644-ի ապրիլի 3-ին իր գրած նամակով հայտնում է. «Մենք մշտապես տառապում ենք հայերի հալածանքներից, որի հետևանքով միսիոներների վտարումը այս շրջանից միշտ պետք է աչքի առաջ ունենալ: Եթե բոլոր նրանց դեմ (խոսքը հայերի մասին է—Վ. Բ.), ովքեր ապրում են կաթոլիկական երկրներում գործադրվեն սպառնալիքներ, ապա թերևս հնարավոր կլինի, որ մենք այստեղ ազատ լինենք»²⁴:

1694 թ. Նոր Զուղայում կաթոլիկների և լուսավորչականների մեջ ծագած մեծ խռովության ժամանակ կաթոլիկ եպիսկոպոս Պիդոն Զուղայում գործող բոլոր կաթոլիկական միաբանությունների միսիոներներին շտապ կարգով հավաքում է ընդհանուր խորհրդակցության, որտեղ որոշում են ստորագրել մի դիմում եվրոպական քրիստոնեական թագավորների անունով, որպեսզի վերջիններս օգնեն իրենց և զսպեն ջուղայեցիների «սանձարձակությունները», կալանքի ենթարկելով նրանց ապրանքները թե՛ ծովում և թե՛ ցամաքում²⁵:

Այս դիմումներին անմիջապես ընթացք էին տրվում և նույնիսկ մշակվում էին հատուկ միջոցառումներ: Օրինակ՝ Քարմելիթ Դիոնիսիուսը «Հավատի միաբանության» քարտուղարությանը ներկայացնում էր մի առաջարկ, ըստ որի Եվրոպայում հայերի նկատմամբ հալածանքներ սկսելը դիտվում էր որպես Նոր Զուղայում նրանց հայրենակիցներին զսպելու հնարավոր միջոցներից մեկը:

Սակայն ոչ միշտ էին այդօրինակ հալածանքները հայ խոջաների նկատմամբ սպասված արդյունքի հասցնում: Հաճախ, ընդհակառակն, Եվրոպայում բախվելով իրենց ազգային ու կրոնական զգացմունքների ոտնահարման փաստերի հետ և ենթարկվելով անօրինական հալածանքների, նրանք էլ ավելի մեծ թշնամանքով էին լցվում կաթոլիկների հանդեպ: Այդ մասին է վկայում Նախիջևանի կաթոլիկների եպիսկոպոս Փիրումալիի նամակը՝ ուղղված Հռոմին, որտեղ նա ահազանգում է, որ «այն վաճառականները, որոնք իրենց առևտրական գործերով եղել են Եվրոպայում, ավելի համառ և եռանդագին դիմադրություն են ցույց տալիս միավորման գաղափարին և առավել մեծ եռանդով են աշխատում ժողովրդի մեջ հարուցել զգվանք դեպի Հռոմը»²⁶:

Այսպիսով, եթե մի կողմից հայ խոջայության զգալի մասը ելնելով իր առևտրական շահերից, աշխատում էր բարեկամական կապեր պահպանել հռոմեական եկեղեցու հետ, երբեմն նույնիսկ աջակցելով նրան, մյուս կողմից, սակայն, նա աշխատում էր հետ պահել զաղութի լուսավորչական հայությանը կաթոլիկներին հարելու և կամ նրանց նկատմամբ համակրանք տածելու ձրգտումից: Պարսկահայատակ և իր շահերով առավել կաթոլիկներից ավելի պարսկական կառավարության հետ կապված լինելով, հայ խոջայությունը, բնականաբար, աշխատում էր կասկածի չենթարկել միսիոներների և կաթոլիկ երկրների հետ իր ունեցած կապերը:

²⁴ Ibid, I, p. 375.

²⁵ A Chronicle..., I, p. 375.

²⁶ A Chronicle..., I, p. 375.

Անդրադառնալով հայ խոջայության այդ երկդիմի վերաբերմունքին, ակադեմիկոս Ա. Հովհաննիսյանը նկատում է. «Պապական ժողովի մեջ հեշտ ընկնողներից չէին Նոր ջուղացիները: Բարի հարաբերությունների մեջ մտնելու հետ՝ այդ կնպաստեր նրանց շահաստացությանը, բայց հպատակվելու հետ՝ կնշանակեր գծավել իրանի հետ»²⁷: Իր նկատմամբ կառավարության կասկածանքը հարուցելու դեպքում, հայ խոջայությունը ոչ միայն կարող էր զրկվել իր ամբողջ ունեցվածքից, այլև ենթարկվել բռնի մահմեդականացման: Իսկ այդպիսի փաստերը քիչ չէին նույնիսկ Աբբաս 1-ի օրոք²⁸: Անշուշտ այս հանգամանքը լավ հասկանում էին նաև միսիոներները: Այսպես, Դիոնիսիոսը 1642 թ. տեղեկագրում էր Հոռոմ, որ «Նոր Զուղայի ամենահարուստ հայերը, որոնք ի վիճակի են մեծ օգնություն ցուցաբերել մեզ, հանդիսանում են միաժամանակ ամենավախկոտները, որովհետև չափազանց շատ բան ունեն, որից կարող են զրկվել»²⁹:

Նոր Զուղայում կաթոլիկ միսիոներների ասիմիլյատորական մտադրությունների իրականացման ճանապարհին զորեղ խոչընդոտ էր հանդիսանում դադութի հայկական լուսավորչական հոգևորականությունը: Եվ այդ հասկանալի է. միսիոներների բռնի գործունեությունը գաղութի հայության մեջ սպառնալիքի տակ էր դնում ոչ միայն նրա դիրքն ու ազդեցությունը, այլև իր դոյությունը: Չցանկանալով զրկվել իր հոտից, նա անհաշտ պայքարի է նետվում քարոզիչների դեմ: Հոռոմի պապին և իրենց անմիջական ղեկավարներին ուղղված միսիոներների շատ նամակներում տազնապով է արտահայտվում հայ հոգևորականության դիմադրության և իրենց նկատմամբ հալածանքներ կիրառելու առթիվ: Օրինակ՝ Քարմելիթ Ֆելիքսը խոսելով հայերի մեջ քարոզչական աշխատանքի վատ վիճակի մասին, իրենց անհաջողությունների հիմնական պատճառը համարում էր «հայ եպիսկոպոսների և հոգևորականության մեծ դիմադրությունը»³⁰:

Վատիկանի համար պարզ էր, որ հայ ժողովրդին կաթոլիկության մեջ ներգրավելու գործը հեշտացնելու համար նախ պետք է ընկճել նրա եկեղեցու և հոգևորականության դիմադրությունը: Միսիոներների միջոցով Վատիկանը մանրամասն տեղեկություն էր ստանում հայ հոգևորականության նկատմամբ պարսկական կառավարության (հատկապես վերջին սեֆևիների օրոք) գործադրված հալածանքների և նրա վրա դրված ծանր հարկերի մասին: Օգտվելով դրանից, նա աշխատում էր հայ հոգևորականության մեջ այն կարծիքն ստեղծել, թե իր այդ խղճուկ և ծանր վիճակից դուրս գալու միակ ելքը Հոռոմի ամենազոր աթոռի հետ միանալն է:

Հայ եկեղեցին իր ազդեցությանը ենթարկելու արդյունավետ միջոցներից մեկը Վատիկանը համարում էր հայ բարձր հոգևորականությանը, առաջին հերթին՝ իրեն կաթոլիկոսին, կաթոլիկության գիրկը գրավելը, որպեսզի պատրիարքական աթոռին տիրանալով ժողովրդին պարտադրի իր դոգմաները: Այդ

²⁷ Ա. Հովհաննիսյան, Դիմագրեր հայ ազատագրական մտքի պատմության, գիրք 2-րդ, Երևան, 1959, էջ 107:

²⁸ نصر الله فلسفی، زندگانی شاه عباس اول، جلد سوم، طهران، 1336 ص 233—235.

²⁹ A Chronicle..., II, p. 1072.

³⁰ A Chronicle..., II, p. 1075.

նպատակով, Հռոմի հանձնարարությամբ, միսիոներներից ամենապատրաստվածները և ազդեցիկները զրույցներ էին ունենում հայ բարձրաստիճան հոգեվորականների, ներառյալ նաև կաթողիկոսների հետ: Քարմելիթ Թիմասր «Հավատի պրոպագանդայի» պրեֆեկտ կարգինալ Լյուդովիկոսին ուղղված իր նամակում հետևյալն է գրում. «Նոր Զուգայում ես հանդիպում ունեցա նորրնտիբ պատրիարք Մովսեսի հետ (խոսքի Մովսես Տաթևացի կաթողիկոսի մասին է. — Վ. Բ.) և համաձայն Ձեր հանձնարարության զրույցի կրոնական հարցերի շուրջը»³¹:

Պետք է ենթադրել, որ զրույցի ընթացքում Հռոմի ներկայացուցիչը չի սահմանափակվել լուկ կրոնական դոգմաների շուրջը խոսակցություններով, այլ աշխատել է շոշափել հայ կաթողիկոսի վերաբերմունքը Հռոմի և կաթոլիկ եկեղեցու նկատմամբ, գուցե և աշխատել է համոզել կաթողիկոսին ընդունել Պետրոսի աթոռի գերիշխանությունը: Օգտվելով սեֆեյան շահերի, հատկապես Աբբաս 1-ինի վերաբերմունքից դեպի Հռոմի պապը և կաթոլիկական երկրները, միսիոներները փորձում են համոզել շահերին, որ նրանք ճնշում գործ դնեն հայ կաթողիկոսների վրա, որպեսզի հպատակություն հայտնեն Հռոմին:

Այդ երևում է ավգուստինյան միաբանության միսիոներ Անտոնիո դե Գուվեայի հուշագրությունից. «...Շահին (Աբբաս 1-ին. — Վ. Բ.) դիմելով ասացի. այժմ, որ կրկին անգամ ինձ ուղարկում եք Նվրոպա, հրամայեցեք հայ պատրիարքին, որ ուղեկցի ինձ և մյուս պատրիարքների նման համբուրի Պապի ոտքերը և իր հպատակությունը հայտնի նրան: Ի պատասխան շահը ասաց. Դուք գիտեք, որ իմ երկրում յուրաքանչյուր ոք ազատ է ապրելու այնպես, ինչպես ինքը կցանկանա, և դավանելու այն կրոնը, որը առավել մոտ է իր սրտին: Հետևաբար ես չեմ կարող ստիպել հայ պատրիարքին, որպեսզի նա ուղեկցի ձեզ»³²:

Շահը այլ պատասխան չէր էլ կարող տալ: Հայերի կաթոլիկությունն ընդունելը հակասում էր Իրանի պետական շահերին, որովհետև վերջինս շահագրգռված էր պահպանելու իր տիրապետությունը հայերի նկատմամբ, որոնց նա նայում էր թե որպես հարկատու հպատակների և թե առևտրական միջնորդների, որոնցից նա քաղում էր մեծամեծ օգուտներ³³: Նկատելով այդ, Նոր Զուգայում քարմելիթ Դիոնիսիոսը զգուշացնում էր Հռոմին. «Կառավարությունը դառնում է, որ շահի հպատակների կաթոլիկ դառնալը հակասում է իրենց պետական շահերին: Այս կարևոր հանգամանքը հաշվի չառնելու դեպքում կարող է ամեն ինչ կործանվել»³⁴: Սրան Զոն Թագդեուսը ավելացնում էր. «Դուք չպետք է կարծեք, որ շահ Աբբասը (1-ը. — Վ. Բ.) մեզ թույլ կտա իր հպատակներին դարձնել քրիստոնյա, ընդհակառակը, նա առիթի դեպքում աշխատում է ստիպել հայ քրիստոնյաներին, ֆրանկներին և այլ ազգությունների պատկանող քրիստոնյաներին դառնալ մահմեդական»³⁵:

³¹ A Chronicle..., p. 319.

³² نصراله فلسفی، زندگانی... جلد سوم، ص 68.

³³ Տ. Հակոբյան, Հայերի պայքարը կաթոլիկական միսիոնների ասիմիլյատորական ձգտումների դեմ Իրանում (17—18-րդ դարերում), Արևելագիտական ժողովածու, 1, Իրևան, 1960, էջ 269.

³⁴ A Chronicle..., II, p. 1072.

³⁵ Ibid, I, p. 165.

Այս հանգամանքը շուտով պարզ է դառնում նաև հենց իրեն, Անտոնիո դե Գուվեայի համար՝ նրա խնդրում է Աբբաս 1-ին, որպեսզի թույլ տա հայերին, վրացիներին և իրանի ալյազգի մյուս քրիստոնյաներին դարձնելու «ճշմարիտ քրիստոնյաներ», շահը անորոշ պատասխան է տալիս նրան և անմիջապես իր մոտ կանչում հայերի, ինչպես նաև մյուս քրիստոնյաների հոգեվոր առաջնորդներին և բարեկամաբար հասկացնում, որ իր համար ցանկալի չէ, որ իր հպատակները ընդունեն կաթոլիկություն³⁶։ Քրիստոնյաների նկատմամբ այսպիսի քաղաքականություն վարում էին ոչ միայն Աբբաս 1-ը, այլև հետագա սեֆևիդները։

Այս ամենը հաշվի առնելով, բնականաբար, սեֆևյան կառավարությունը չէր կարող թույլ տալ, որ այնպիսի մի ազդեցիկ կազմակերպություն, ինչպես հայկական եկեղեցին էր, հարի կաթոլիկությանը և դառնա օտարահպատակ։ Դեռ ավելին. պատմական աղբյուրները մեզ հիմք են տալիս ենթադրելու, որ կառավարությունը հայ հոգևորականությանը օգտագործում էր իրանում կաթոլիկների աճող ազդեցության դեմ պայքարելու համար։ Այս քաղաքականությունը մեծ հաջողությամբ հատկապես կիրառվում էր Նոր Զուղայում, որտեղ կաթոլիկների դեմ բուռն ելույթների համար պարսկական կառավարությունը ոչ միայն ճնշում գործ չէր դնում հոգևորականության նկատմամբ, այլև ընդհակառակը՝ վճռական պահերին միշտ բռնում էր նրա կողմը։

Միսիոներների դեմ պայքարում հայ հոգևորականությունը օգտագործում էր ամեն մի հնարավոր միջոց՝ նրանց քարոզչական աշխատանքը ձախողելու համար։ Օրինակ, նա արգելում է հայ պատանիներին սովորել կաթոլիկների դպրոցում³⁷, նվազի ենթարկելու սպառնալիքով խոչընդոտում է հայերի և կաթոլիկների ամուսնությունը³⁸, կաշառում է տեղական իշխանություններին կառավարության մոտ ծանր մեղադրանքներով ամբաստանում է միսիոներներին ասելով, որ նրանց իսկական նպատակն է «լրտեսել զել և մուսա Պարսկաստանի և գրել զամենայն անցս երկրին առ թագաւորութիւնս Եւրոպիոյ»³⁹, քանզում է նրանց եկեղեցիները և այլն։ Շատ հաճախ միսիոներների նկատմամբ պարսից կառավարության զայրույթը հարուցելու համար հայ հոգեվորականությունը հայտնում էր նրան, թե կաթոլիկների նպատակն է ոչ միայն դավանափոխ անել հայերին, այլև մահմեդականներին դարձնել քրիստոնյա։ Սա վերին աստիճանի ծանր մեղադրանք էր։ Անդրադառնալով այդ հարցին, միսիոներներից մեկը գրում էր, որ «զա բավական է, որ մեզ դուրս վնդեն ոչ միայն Զուղայից, այլև Իրանից»⁴⁰։

Հայ հոգևորականության պայքարի միջոցներից մեկն էլ զաղափարական պայքարն էր։ Այդ առթիվ Լեոն նշում է, որ քարոզիչների դեմ կոմբիլու անհրաժեշտությունը ստիպեց հայ կղերականներին գրքեր շարագրել⁴¹։

Զուղայի տպարանը լույս է ընծայում Աղեքսանդր վարդապետի «Գիրք, որ ասի վիճարանական» աշխատությունը, և Հովհաննես Մրքուզ վարդապետի

³⁶ نصر الله فلسفی، زندگانی... جلد سوم، ص. 231.

³⁷ A Chronicle..., I, p. 378.

³⁸ Ibid, I, p. 456.

³⁹ Հ. Տ եր-ձ ո վ հ ա ն յ ա ն ց, Պատմություն Նոր-Զուղայի, հ. 2-րդ, Նոր-Զուղա, 1880, էջ 266.

⁴⁰ A Chronicle..., II, p. J075.

⁴¹ Լ և ո, Հայկական տպագրություն, հատոր 1-ին, Թիֆլիս, 1901, էջ 250.

«Գիրք իսկապես համառոտ ճշմարիտ հաւատոյ»⁴², իսկ Ամենափրկչյան վանքի թեմակալ առաջնորդ Ստեփանոս Զուղայեցին գրում է «Գիրք հակաճառական ընդդեմ պապականաց» հեղինակությունը⁴³։ Այս աշխատությունները անշուշտ որոշակի դեր են կատարել հայկական եկեղեցու սկզբունքները կաթոլիկների հարձակումներից պաշտպանելու գործում և օգնել են գաղութի հայությանը ղոհ չգնալու միսիոներների ասիմիլյատորական ախորժակին։

Սակայն հայ հոգևորականությունը ևս ուներ խոցելի տեղեր, որոնք միսիոներների կողմից օգտագործվում էին նրա դիմադրությունը ճնշելու համար։ Սերտորեն կապված լինելով առևտրական դասի հետ, հայ եկեղեցին շէր կարող հաշվի չնստել նրա շահերի հետ։ Այդ պատճառով միսիոներները շատ հաճախ դիմում էին առավել փորձված մեթոդի՝ ճնշում էին գործադրում հայ խոջայության վրա։ Բայրուրյանը իրավացիորեն նկատում է, որ «հանդիպելով հայկական եկեղեցու համառ դիմադրությանը, կաթոլիկ կղերի մեջ գաղափար էր ծնվել, թե մի գուցե հայերի հավատափոխությունը ավելի հեշտ կլիներ, եթե Հռոմն իր ազդեցությունը օգտագործեր ընդդեմ Եվրոպայում գտնվող հայ վաճառականների»⁴⁴։ Այս մեթոդը մասամբ արդարացնում էր իրեն։ Երբ հայ հոգևորականությունը նոր Զուղայում ուժեղացնում էր իր հալածանքները միսիոներների դեմ, վերջիններս անմիջապես իրենց հովանավորող պետությունների և Հռոմի միջոցով պատասխան գործողություններ էին ծավալում հայ խոջայության դեմ։ Իսկ սա վնասներ չկրելու համար, հայ հոգևորականությունից պահանջում էր զուսպ լինել իրենց կրքերի մեջ։ Այսպես օրինակ, 1688 թ. նոր Զուղայում լուսավորչական հոգևորականության և ճիզվիտների մեջ մեծ խռովություն է ծագում։ Պայքարի գլուխ է կանգնում Ամենափրկչյան վանքի առաջնորդ Ստեփաննոս եպիսկոպոսը, որը լրտեսության մեջ մեղադրելով միսիոներներին, շահից պահանջում է նրանց վտարել նոր Զուղայից։ Անսալով այդ բողոքին 1689 թ. շահը հրամայում է քանդել քարմեծիկների եկեղեցին և նոր Զուղայից արտաքսել ճիզվիտներին։ Այս դեպքերի առթիվ անմիջապես գործին խառնվում են շահի պալատին մոտ կանգնած փորթուզալացի ներկայացուցիչները, որոնք Հնդկաստանում առևտուր անող խոջաներին սպառնում են՝ եթե ամենակարճ ժամկետում վերջ չտրվի միսիոներների հալածանքին, ապա իրենք համապատասխան միջոցներ ձեռք կառնեն, որպեսզի խոջաները Հնդկաստանում ենթարկվեն նույնանման հալածանքների⁴⁵։ Այս նախազգուշացումը անմիջապես ունենում է իր հետևանքները։ Հայ հոգևորականությունը, խոջաների պահանջով, ստիպված է լինում միառժամանակ դադարեցնել իր թշնամական գործողությունները միսիոներների դեմ, որոնք մեծ հանդիսավորությամբ կրկին վերադառնում են նոր Զուղա։

Միակ ունալ ուժը, որի վրա հենվելով միսիոներները դիմանում էին նոր Զուղայում և կարողանում էին ծավալել քարոզչական աշխատանք, կաթոլիկությունն ընդունած տեղացի հայերն էին, հատկապես նրանց ազդեցիկ ու

⁴² Նույնը, 1, էջ 249։

⁴³ Ա. Ս Ր Է Մ Յ Ա Ն, Ս. Ամենափրկչյան վանքի թեմակալ առաջնորդները, նոր Զուղա, 1919, էջ 24։

⁴⁴ Վ. Բայրուրյան, Զուղայեցի խոջա նաղար և իր գերդաստանը (առանձնատիպ), էջ 92։

⁴⁵ A Chronicle..., 1, p. p. 462—464.

հարուստ մասը, որից քարոզիչները ստանում էին լայն նյութական ու բարոյական աջակցություն: Կաթոլիկ համայնքը Նոր Զուղայում գլխավորում էր Շահրիմանյան հարուստ առևտրական ընտանիքը, որն իր ունեցվածքից մեծ բաժին էր հանում միսիոներներին: Միայն քարմեխիթների միաբանության քարոզիչներին նրա հատկացրած տարեկան նպաստը կազմում էր 500 սկուդի, չհաշված հասարակական բաղանիքից ստացված եկամուտների այն զգալի մասը, որը ևս նրանց էր տրամադրվում: Այնպես, որ վերջիններիս բյուջեն լրիվ ինքնաբավ էր և այլևս կարիք չունեին Հոռմից նյութական օգնություն ստանալ⁴⁶: Բնական է, որ Շահրիմանյաններից ստացած նպաստների զգալի մասը քարոզիչներն օգտագործում էին «հոգիների որսը» առաջ տանելու համար:

Այս ընտանիքի քաղաքական օրինենտացիան ամբողջապես եվրոպական կաթոլիկական պետությունների կողմն էր: Բնականաբար Շահրիմանյանների և առհասարակ Զուղայի կաթոլիկ խոջանների օտար օրինենտացիան անցանկալի էր պարսկական կառավարության համար: Սակայն ի նկատի առնելով նրանց մեծ դերը Իրանի առևտրական կապերի ամրապնդման գործում եվրոպական երկրների հետ, ինչպես նաև մեծապես օգտվելով նրանց առևտրի բերած եկամուտներից, պարսկական կառավարությունը համբերատար վերաբերմունք էր ցույց տալիս նրանց նկատմամբ: Ավելին, Զուղայի կաթոլիկ խոջանները նպաստում էին նաև իրանա-եվրոպական քաղաքական կապերի ամրապնդմանը, հատկապես հակաթուրքական դաշինք կնքելուն:

Այս բոլորով հանդերձ, ոչ մի երաշխիք չկար, որ պարսկական կառավարությունը միշտ միևնույն համբերատարությամբ կվերաբերվի կաթոլիկ խոջաններին: Սեֆեյան իշխանությունների ցասմանը ենթարկվելու վտանգը միշտ էլ կար թե՛ կաթոլիկ քարոզիչների և թե՛ նրանց հետևորդների համար: Հոռմին տեղեկագրելով լուսավորչականների և կաթոլիկների միջև Նոր Զուղայում 1694 թ. ծագած խռովությունների մասին, միսիոներները նշում էին, որ «խռովության ժամանակ հայ կաթոլիկները չէին համարձակվում նույնիսկ այցելել իրենց, որովհետև շահի գլխավոր կառավարիչը սպառնացել էր Խոջա Մարդարին (Շահրիմանյան.—Վ. Բ.), որ նա կզրկվի իր գլխից, եթե հայ-կաթոլիկները թեկուզ համարձակվեն խոսել ֆրանկների հետ: Այսպիսով,—զանգատվում էր նա,—մենք ստիպված էինք միմյանց հետ կապ պահպանել նամականների միջոցով»⁴⁷:

Եթե լուսավորչականների և կաթոլիկների պայքարում սեֆեյան կառավարությունը սովորաբար բռնում էր լուսավորչականների կողմը, ապա որպես կաթոլիկների պաշտպան հանդես էին գալիս եվրոպական կաթոլիկական պետությունները: Կաթոլիկ խոջաններին ոգևորելու համար, նրանք, նույնիսկ, բարձր պատիվների էին արժանացնում նրանց: Օրինակ, ի նկատի առնելով Շահրիմանյանների մեծ ծառայությունները Իրանում կաթոլիկության տարածման գործում, 1699 թ. Ավստրիայի կայսր Լեոպոլդ 1-ին Հաբսբուրգը հատուկ հրամանով կոմսության տիտղոս է շնորհում այդ ընտանիքին⁴⁸:

⁴⁶ A Chronicle..., I, p. p. 457, 484, 500; II, p. p. 1078, 1080.

⁴⁷ A Chronicle..., I, p. 467.

⁴⁸ Մ Ե Ս Ր Ա Վ Ի Դ Գ Կ Ե Վ Ե Ս Ո Ղ Ո Ւ Լ Ե Ա Ն, Պատմություն հայոց գաղթականութեան ի Հիվոռոյ քաղաքի, Վենետիկ, 1891, էջ 301—302:

Պարզ է, որ միսիոներներին հովանավորող իսպանական ու ֆրանսիական թագավորներին, հաբսբուրգներին ու վենետիկյան Դոժին առաջին հերթին հետաքրքրում էր ոչ թե «հերձվածող» հայերի մեղապարտ հոգիների փրկության հոգսը, այլ նոր Զուղայի առևտրական կապիտալը ամբողջապես կաթոլիկական դավանանքի դարձնելը և եվրոպական առևտրական կապիտալի շահերի օգտին ծառայեցնելը։ Այդ կաթոլիկ պետություններից յուրաքանչյուրը աշխատում էր Զուղայի առևտրական կապիտալը թեթել իր կողմը և այն օգտագործել եվրոպա-ասիական իր առևտրի ընդլայնման համար։ 17-րդ դարի 2-րդ կեսից սկսած այդ ուղղությամբ մեծ ակտիվություն է սկսում ցուցաբերել հատկապես ֆեոդալա-միապետական Ֆրանսիան, որի առևտրական կապիտալի շահերը պահանջում էին ակտիվ քաղաքականություն վարել արևելքի նկատմամբ⁴⁹։

Ֆրանսիական կապիտալի շահը պահանջում էր, որ ջուղայահայ խոջաները անմիջական կապ ունենան Ֆրանսիայի հետ, արևելքից Ֆրանսիա բերեն իրենց ապրանքները և ֆրանսիական ապրանքներ արտահանեն։ Այսպիսի նպատակներ էին հետապնդում նոր Զուղայում ակտիվ գործունեություն ծավալած ֆրանսիական միսիոներները։ Իզուր չէ, որ նրանց գործունեությունը իրանում և հատկապես Իրանի հայերի շրջանում մեծ անհանգստություն էր պատճառում Ֆրանսիայի մրցակիցներին՝ Անգլիային և Հոլանդիային, որոնք ոչ անհիմն կերպով ենթադրում էին, որ հանձին միսիոներների իրան են թափանցում ֆրանսիական թագավորի գործակալները, ապահովելու համար ֆրանսիական առևտրական կապիտալի շահերը⁵⁰։

Սակայն ինչպես Ֆրանսիայի, այնպես և եվրոպական մյուս պետությունների ու Հռոմի պապի ջանքերը՝ միսիոներների միջոցով հայությունից խլել և կաթոլիկության մեջ ներգրավել նոր Զուղայի գաղութը, նրա առևտրական կապիտալն ի սպաս դնել իրենց գաղութային քաղաքականության շահերին, ավարտվեցին կատարյալ անհաջողությամբ։ Գաղութը կուլ չգնաց և համառ պայքարի միջոցով պահպանեց իր ազգային դեմքն ու ազգային-կրոնական ինքնությունը։

Հանրագումարի բերելով գաղութում կաթոլիկ եկեղեցու կրած անհաջողության հիմնական պատճառները, կարելի է ասել հետևյալը։ Միսիոներների քարոզչական աշխատանքի ձախողման հիմնական պատճառը այն համառ դիմադրությունն էր, որ գաղութի բնակչության լայն խավերը, հավատարիմ մընալով իրենց ազգային տրադիցիաներին, անհաշտորեն մղեցին միսիոներների ասիմիլյատորական նկրտումների դեմ։ Այս հարցում անժխտելի է նաև հայ հոգևորականության կատարած դերը, որը միավորում էր գաղթավայրի բնակչությանը և պայքարի հանում միսիոներների ոտնձգությունների դեմ։ Առանց ժողովրդի լայն խավերի աջակցության, նա, անշուշտ, անզոր կլինեիր դիմագրավել այդ ահավոր գրոհին։

Իրանահայ գաղութում եվրոպական կաթոլիկական պետությունների և վատիկանի գործակալների կրած անհաջողության պատճառներից մեկն էլ տարբեր միաբանությունների փոխադարձ պայքարն էր ու մրցակցությունը։

⁴⁹ А. Рогинская, Очерки по истории Франции XVII—XIX вв., Москва, 1958, стр. 36.

⁵⁰ А. А. Зонненштраль-Пискорский, Международные торговые договоры Персии, Москва, 1931, стр. 48.

Անկասկած այդ պայքարում դրսևորվում էին եվրոպական պետությունների միջև գոյություն ունեցող հակասությունները: Ավդուստինյան միաբանությանը պատկանող միսիոներները, որոնք օգտվում էին իսպանական թագավորի հովանավորությունից, իրենց համարում էին իրանահայերի միակ հովանավորողը, իսկ Վատիկանի և ֆրանսիական միապետության շահերը արտահայտող քարմեխիթյան միաբանության անդամները պնդում էին, թե իրանը հանդիսանում է բացառապես իրենց միաբանության գործունեության ասպարեզ³¹: Անշուշտ այս երկու միաբանությունների միջև գոյություն ունեցող պայքարը հանդիսանում էր ֆրանս-իսպանական հակամարտության արդյունք: Նույնանման հակասություններ և փոխադարձ պայքար գոյություն ունեին նաև այլ կաթոլիկական միաբանությունների միջև:

Այսպիսով, նկատի առնելով այն հանգամանքը, որ իրանում եվրոպական պետությունների շահերի օգտին կապիտուլյացիոն ռեժիմի սահմանման գործում բացառիկ կարևոր դեր էին խաղում նաև կաթոլիկ եկեղեցին և նրա գործակալները, կարելի է ասել, որ իրանահայերի պայքարը ընդդեմ միսիոներների մյուս կողմից օբյեկտիվորեն ուղղված էր իրանում արևմտաեվրոպական գաղութարարների էքսպանսիայի դեմ:

17-րդ դարում իրանահայ գաղութի պայքարը արևմտաեվրոպական պետությունների գործակալների՝ միսիոներների դեմ մի հարց է, որ սպասում է իր հետագա ուսումնասիրողներին:

В. А. Байбуртян

АРМЯНСКАЯ КОЛОНИЯ НОВОЙ ДЖУЛЬФЫ И ОРГАНИЗАЦИИ КАТОЛИЧЕСКИХ МИССИОНЕРОВ (XVII в.)

Р е з ю м е

Колониальная политика западноевропейских держав в отношении Ирана в XVII в. находила широкую поддержку католических миссионеров и Ватикана, которые играли роль своего рода авангарда западноевропейских колонизаторов в Иране.

Своей деятельностью католические миссионерские организации должны были подготовить почву для проникновения в Иран западноевропейского торгового капитала и установления в этой стране кабального режима капитуляций.

Армяне, составлявшие большинство христианского населения государства Сефевидов, были основным объектом деятельности миссионеров. В частности армянская колония—Новая Джульфа была важнейшим центром католической пропаганды в Иране. Обращением населения этой колонии в католичество западноевропейские державы и Ватикан стремились создать базу для распространения своего влияния в Сефевидском государстве.

³¹ A Chronicle..., 1, p. p. 265, 701.

Если армянская торговая буржуазия и духовенство, преследуя корыстные цели, нередко вступали в компромисс с миссионерами и этим облегчали их деятельность в колонии, то основная масса населения колонии последовательно вела непримиримую борьбу против ассимиляторских стремлений миссионеров для защиты своих национальных традиций и сохранения своей национальной самобытности. Объективно борьба эта была направлена и против экспансии в Иран западноевропейских колонизаторов.